

Joel

Un solo dalakochi no ta peligroso. E no ta pika manera sangura, vruminga, òf maribomba. Ta fásil pa mat'è...si por koh'é. Ma miónes di dalakochi huntu por kousa un plaga sumamente destruktivo. Den tempu antiguo (pa Juda i Israel tambe), un di e katástrofenan mas grandi ku un pais por a eksperensíá tabata un plaga di dalakochi. Debi ku den e tempu ei, pueblonan tabata dependiente di agrikultura, e plaga tabata un disaster nashonal...pais kompleto por keda na punto di hamber. Nos ta kòrda ku un dia e dies plaganan promé ku farao a pèrmití Moises guia Israel for di esklabitut na Egipto tabata un plaga di dalakochi (Eksodo 10:12-20).

Un solo dalakochi por pone 120 webu. Nan tur por rende diripiente. Ora nan ta brui tin asina tantu dalakochi ku ta komo sifuera tera ta bibu. Promé nan ta gatia. Despues nan ta bula bai huntu, dirigí pa bientu, na un kantidat tan astronómiko (miónes i biónes) ku nan por forma un nubia grandi. E insektonan aki por biaha na kantidat tan grandi ku di dia ta bira skur i no por mira solo mas. Tin bes por dura tre pa kuater dia pa tur e dalakochinan pasa. Por ehèmpel, ta kalkulá ku na año 1889 un nubia di dalakochi a kubri un área di 5.200 KM kuadrá banda di Laman Kora. Den eranan moderno, por tin asina tantu dalakochi ku ta peligroso pa tren òf outo kore dor ku kamina i rel di tren ta slep ku tur e dalakochinan plechá. For di un distansia por tende nan bin!

Ma e daño ku un plaga di dalakochi a kousa tabata e kalamidat mas grandi! Dalakochinan ta tan destruktivo ku e romanonan a yama e insektonan aki “kimadónan di tera”, pasobra despues ku nan a pasa, e paisahe a parse komo sifuera kandela a pasa.

Unda ku e dalakochinan ta pasa, nan ta hasi daño enorme. Nan tin djente manera zag! Nan ta kome tur—TUR—mata. Den un ratu nan kome TUR fruta, berdura, maishi, tur blachi, tur yerba, tur flor, asta kaska di palu. Dentro di diessinku minüt, un palu grandi ta keda sin balchi...i tur kos bèrdè rònt di dje ta komé. Den un ratu di ora, nan por destruí un área di 130-145 KM kuadrá.

Loke ta stòp un plaga di dalakochi ta frieldat i awa. Anochi e dalakochinan ta para—nan no ta sigui biaha. Si tin plas di awa, e dalakochinan no ta pasa rònt. Nan ta bula den e awa, hoga, i esnan morto ta forma brug pa esnan bibu sigui nan marcha. Ma laman si ta para nan. Na año 125 B.C. tabatin plaga di dalakochi. Bientu a manda nan den laman. Ma olanan a manda e miles di miónes di dalakochi morto bèk riba tera. Esei kousa un holo teribel i tantu enfermedat ku na Egipto, Libya i Sirene 80.000 hende a muri.

E buki di Joel ta papia di un plaga di dalakochi. Ta parse ku poko tempu promé ku Joel a skirbi su buki, Juda a eksperensíá un plaga serio di dalakochi i tambe sekura. Joel a usa e plaga di dalakochi komo fundeshi pa henter e buki. Joel a deskribí e plaga bon kla ku e palabranan, “E tera ta manera hòfi di Edèn nan dilanti, ma un desierto desolá nan tras” (2:3).

I. OUTOR DI E BUKI

A. NÒMBER DI OUTOR

Mayornan di Joel lo tabata hende spiritual. Nan a yama nan yu “Joel” (YOEL, na hebreo). Joel ta nifiká “Jehová ta Dios”. E nòmber Joel tabata masha komún den era di Tèstamènt Bieu. Tin mas òf ménos 12 otro persona ku e mesun nòmber den Beibel.

Ta interesante ku Joel (Jehova ta Dios) ta enfatisá dos biaha ku Jehova ta Dios: “Mi ta SEÑOR boso Dios” (2:27) i “Ami ta SEÑOR boso Dios” (3:17).

B. BIDA DI OUTOR

Nos sa kasi nada di e outor, Joel. E úniko informashon biográfiko ku Joel a duna di su mes ta haña den 1:1: “E palabra di SEÑOR ku a yega na Joel, yu hòMBER di Petuel”. Ma tin siertu informashon ku nos talbes por dedusí.

Klaramente, nòmber di Joel su tata tabata Petuel (1:1). Kasi sigur Joel tabata un habitante di Juda. Kisas el a biba na Jerusalèm òf den serkania di Jerusalèm, ma no tin prueba sigur pa esei.

Algun studiante di Beibel ta pensa ku Joel tabata un saserdote promé ku Dios a yam’é pa ta un profeta. Ma no tin evidencia pa esaki tampoko. Alkontrario, Joel a papia di e saserdotenan komo sifuera e no ta un di nan (1:13; 2:17).

Pusíbelmente Joel tabata un di e promé profetanan pa skirbi un buki di Beibel (entre e profetanan mayo komo menor). Talbes Joel su ministerio a tuma lugá entre 835-812 B.C. Si esei ta e kaso, Joel pusíbelmente a konosé tantu Elias komo Eliseo, maske nan tabata profetanan pa ku Israel...no Juda. Kisas Abdias tabata un otro profeta ku a biba promé ku òf durante tempu di Joel su ministerio.

Joel ta mensioná un otro biaha so den Beibel, den Echunan 2:16.

II. LEKTORNAN DI E BUKI

Joel ta skirbi pa e “habitantenan di e tera” (1:2,14; 2:1)...esta, Juda. Ta opvio ku e lektornan prinsipal di e buki tabata suidadanonan di Juda: “Juda” ta mensioná 6X den buki di Joel, “Jerusalèm” (6X) i “Sion” (7X). En kontraste, “Israel” ta mensioná 3X.

Talbes por indiká mas eksakto pa ken Joel a dirigí su palabranan, debí ku Joel a mensioná spesífikamente “ansianonan” (1:2), “saserdotenan” (1:13; 2:17), “kunukeronan” (1:11), “kuidadónan di kunuku di wendruif” (1:11).

III. FECHA DI E BUKI

Pa yega na un fecha pa e buki ta sumamente difísil...talbes impusíbel. Ma nos por sikiera ripará algun punto.

A. ERA DI E BUKI

Joel a skirbi su buki nèt despues ku Juda a sufri un sla duru ekonómiko debí na un plaga severo di dalakochi i sekura (1:2-3). Joel tabata konvensé ku esaki tabata Dios Su huisio riba Juda. El a usa e ehèmpel aki pa skirbi tokante Dios Su huisio mas severo den futuro.

B. FECHA DI E BUKI

Opinion pa ku e fecha ku buki di Joel a wòrdu skirbí ta varia hopi: entre síglo 8 te di 4 síglo B.C. Nota algun detaye ku por mustra den direkshon di un fecha general:

1. Joel a duna vários indikashon ku el a skirbi su buki sigur promé ku destrukshon di Jerusalèm. Ta visto ku tempu ku Joel a skirbi, e tèmper tabata eksistí ainda (1:14) i e tabata operashonal (1:9,13-14; 2:15-17). Tambe ta parse ku Joel a skirbi di e murayanan di Jerusalèm (2:9). Si esei ta e kaso, e murayanan ta para ainda. Pues, e buki mester a wòrdu skirbí promé ku e konkísta di Jerusalèm na man di Babilonia na aña 586 B.C.

2. Kuminsando ku mas òf ménos aña 700 B.C., Asiria i Babilonia a ataká òf menasá Juda. Ma buki di Joel no ta menshoná e asirionan ni e babilonianan komo enemigu. Esnan ku Joel a menshoná tabata enemigunan di un era anterior: Fenisia (Tiro i Sidon), Filistea, Egipto, i Edòm (3:4,19). Ta notabel ku despues di era di Joas, e nashonnan ei no tabata un menasa mas pa Juda. Pues Joel a skirbi e buki sikiera promé ku aña 700 B.C. Ademas, ta interesante ku Joel a laga sa ku destrukshon di Edom tin ku sosodé ainda (3:19).

3. Ta parse ku tantu Isaias komo Amos a “fia” ekspreshonnan for di buki di Joel. Nota e diferente tekstonan unda Isaias ta “fia” for di Joel:

JOEL	ISAIAS	PALABRANAN “FIA”
1:15	13:6	“e dia di SEÑOR ta serka”
2:3	51:3	Desolashon en kontraste di hòfi di Eden
2:10	13:10	Solo, luna i streanan ta bira skur
3:10	2:4	Plug i skèr-pa snui bira arma pa guera òf vise versa
3:16	13:13	Shelunan i tera ta tembla

Isaias a profetisá na fin di sigo 8. Pues ta mas interesante ku nota e sitanan di Amos. Tantu Joel 3:18 komo Amos 9:13 ta bisa “e serunan lo gotia biña dushi”. Tambe Joel 3:16 i Amos 1:2 ta usa e palabranan “SEÑOR ta brama for di Sion, i for di Jerusalèm E ta lanta Su bos”. Si ta bèrdat ku Amos a fia for di Joel, anto Joel lo a skirbi su buki promé ku Amos i kisas Joel tabata e promé profeta-otor di un buki di Beibel den sekshon profétiko di Tèstament Bieu. Nos lo mira mas despues ku ku e ministerio di Amos talbes por ta fechá entre 765 i 755 B.C. Si Joel a skirbi promé ku Amos, e buki su fecha lo ta promé ku aña 765 B.C.

4. Ta interesante ku buki di Joel ni ta menshoná un rei. Di bèrdat, ta parse ku e ansianonan i saserdotenan tabata responsabel pa gobernashon nashonal di Juda.

E tipo di gobièrno impliká dor di e profesianan aki ta kuadra mas ku e gobernashonden era di Joaida (2 Reinan 12 i 2 Krónikanan 23-24). Joas a wòrdu koroná komo rei di Juda ku shete aña. Debí ku e tabata un mucha ainda, e sumosaserdote, Joaida, tabata esun ku a goberná te ora ku Joas tabata basta grandi.

Tur esaki ta duna indikashon ku buki di Joel a wòrdu skirbí entre 835-830 B.C.

IV. PROPOSITO DI E BUKI

Oseas su mensahe a originá ku un kurason kibrá pa motibu di su situashon familiar. Joel su mensahe ta originá ku un disaster nashonal: plaga di dalakochi i sekura (1:19-20). E kombinashon aki a trese e pais na punto di hamber.

Joel a wak mas aleu ku e ehersito di dalakochi pa mira un otro ehersito—un ehersito pagano literal atakando pueblo di Dios komo Dios Su forma di huisio (3:2). Pues, Joel a usa e huisio di Dios *aktual* pa ilustrá e huisio di Dios *final binidero*.

Sin duda “e dia di SEÑOR” ta un lema prinsipal di Joel. E plaga di dalakochi ku Juda a eksperensia—tabata un huisio di Dios, un “dia di SEÑOR”. Joel ta skirbi pa laga sa di otro “dianan di SEÑOR” i “e dia di SEÑOR” ku (for di su perspektiva) tin ku bin ainda!

Pues, por bisa ku Joel a skirbi pa avisá di e huisio di Dios ku lo bin riba pueblo di Dios den e “dia di SEÑOR”. E destrukshon di e “dia di SEÑOR” ta ilustrá dor di un plaga di dalakochi. E plaga ta mustra den direkshon di e destrukshon di e tempu final ora e forsan di inkredulonan lo haña nan pago.

Ku esaki en bista, por bisa ku tin tres proposito pa e profesia di Joel:

A. Pa pronostiká e huisio ku ta bin pa Juda pa motibu di nan piká.

B. Pa reta Juda pa repentí i bira na Señor. Algun studiante di Beibel ta yama Joel “e profeta di revivamentu”. El a enfatisá repentimentu promé ku por tin revivamentu!

C. Pa enfatisá ku historia di mundu lo kulminá un dia ku e dia di Señor ora hustisia finalmente lo ta viktوريوسo.

V. STRUKTURA DI E BUKI

- I. E PLAGA DI DALAKOCHI – 1:1 – 2:27
 - A. E Plaga – 1:1-20
 - B. E Yamada pa Repentí – 2:1-17
 - C. Misericòrdia i Alivio Divino Primintí – 2:18-27
- II. UN DIA DI SEÑOR DEN FUTURO – 2:28 – 3:21
 - A. E Deráme di Spiritu Santu – 2:28-32
 - B. E Deráme di Huisio Riba e Nashonnan – 3:1-17
 - C. E Deráme di Bendishon Riba Israel – 3:18-21

VI. KONTENIDO DI E BUKI

A. “E DIA DI SEÑOR” DEN BUKI DI JOEL

E “dia di SEÑOR” ta un ekspreshon ku Joel a introdusí promé. El a usa e frase aki 5X: 1:15; 2:1,11,31; 3:14. Otro profetanana a usa e ekspreshon aki despues, mas ku trinta biaha: Isaias 2:12,17,20; 4:1,2; 13:6-9; 14:3; Jeremias 30:7-8; 46:10; Ezekiel 13:5; 30:3; Amos 5:18; Sofonias 1:7,14; Malakias 4:5. E “dia di SEÑOR” tambe ta un ekspreshon ku eskritornan di Tèstament Nobo a usa, p.e. 1 Korintionan 5:5; 1 Tesalonisensenan 5:2; 2 Tesalonisensenan 2:2; 2 Pedro 3:10.

Ta importante pa komprendé ku e “dia di SEÑOR” no ta referí na un dia di 24 ora. E “dia di SEÑOR” ta usá den 2 sintido den Skritura:


1. “E dia di Señor” profétiko

Esaki ta referí na e tempu ku Dios lo trata ku Su pueblo i e paganonan na fin di historia humano. Usá den e forma aki, e ta inkluí: e Tribulashon, e di dos binida di Kristo, i Mileño, èts.

2. Un “dia di Señor” general

Usá di e forma aki, e por referí na *kualke era* ku Dios ta trata ku hende—skapando i bendishoná e hustunan i tambe huzgando i kastigando malbadonan. Pues, “e dia di SEÑOR” ta inkluí tantu bendishon komo kastigu. E por ta kumplí diferente biaha di diferente forma *parsial*. Ma tin *solamente ún kumplimentu kompleto di “e dia di SEÑOR”*.

“Dia di SEÑOR” den Joel:



Joel a usa e plaga di dalakochi komo fundeshi pa papia tokante “e dia di SEÑOR”. Por bisa ku Joel ta duna un bista di henter historia humano kulminando den Kristo, i Israel komo un partisipante importante den e era final.

B. ASPEKTONAN PROFÉTIKO DEN BUKI DI JOEL

Si Joel ta un di e promé profetanán, loke el a skirbi ta mas ku asombroso. El a profetisá di eventonan hopi leu den futuro. Algun di su profesianan tabata tokante:

- Dia di Pentekostes – 2:28-29
- Armagedon – 3:12-13
- Tribulashon – 2:30-31; 3:14-16
- Huzgamentu di nashonnan – 3:1-2

Ma ta interesante ta Joel tin ningun profesia spesífiko tokante e Mesias den su buki!

Por dividí buki di Joel den 4 sekshon a base di “e dia di SEÑOR”:

C. SPLIKASHON BREVE DI E BUKI DI JOEL

Nos lo dividí e buki segun un di e skemanan ariba.

I. Dia di Señor den Pasado – 1:1-20

Poko tempu promé ku Joel a skirbi, Juda a eksperensiá un plaga di dalakochi. Pusíbelmente 1:4 ta indiká ku Juda a eksperensiá kuater plaga di dalakochi tras di otro. Siendo un pueblo dependiente di agrikultura, e plaga tabata un sla hopi duru...un disaster nashonal. E plaga plus e sekura (1:19-20) a trese e pais na punto di hamber. Lo dura añanan pa rekuperá. Talbes e pueblo i tounan di Juda tabata muri di hamber tempu ku Joel tabata skirbi.

Dos Kronikanan 7:13-14 a duna di konosé pakiko pueblo di Dios lo eksperensiá kalamidatnan asina. Kalamidatnan tabata Dios Su kastigu pa e piká di Su pueblo.

Joel a uso a plaga di dalakochi (un “dia di SEÑOR”) komo ehèmpel pa laga sa di Dios Su huisio ku lo bin den futuro...otro “dianan di SEÑOR”!

II. Dia di Señor Pendiente – 2:1-11

No ta sigur na ki sorto di “dia di Señor” Joel ta referí...sea ta un dia literal òf un dia simbóliko. Joel aki a referí na e “dia di Señor”...esta e tribulashon? Of Joel a skirbi di un ehersito ku lo invadí Juda—manera Babilonia? Ta mas probable ku 2:1-11 ta referí na un otro plaga literal pió di dalakochi. (Ripará ku Joel a bisa ku esnan ku a invadí Juda ta “manera” kabai, koredó di kabai, sòldá, èts. (2:4-7). Kompará tambe 2:11 ku 2:25. Den tur dos teksto, Dios ta papia di “Mi/Su ehersito”. Ta opvio di 2:25 ku “Mi ehersito” ta e dalakochinan.

Di tur manera, echu ta ku Dios ta menasá mas katástrofe riba Juda si nan no bolbe n’E!

III. Señor Su yamada pa Revivamentu – 2:12-27

Den e sekshon aki, Dios ta yama Su pueblo pa evitá Su huisio dor di repentimentu i revivamentu! Tambe 2:18-27 ta mostra ku Dios lo bendishoná si Su pueblo ta bandoná nan piká.

IV. Dia di Señor futuro – 2:28 – 3:21

Tin poko duda ku aki Joel ta referí na un era futuro ainda—e “dia di Señor” den futuro. Dios ta laga sa ku den e “dia” aki, E lo huzga nashonnan i hende pekador.

Literatura Konsultá

- Archer, Gleason L. Jr., *A Survey of the Old Testament Introduction* (Chicago: Moody Press, 1985), p. 310-314.
- Baxter, J. Sidlow, *Explore the Book* (Grand Rapids: Zondervan Publishing House, 1960), vol. 4, p. 105-124.
- Demaray, Donald E., *A Layman's Guide to Our Bible* (Los Angeles: Cowman Publishing Company, 1964), p. 110.
- Douglas, Alban, *Old Testament Survey* anotashon di lèsnan na Prairie Bible Institute (Three Hills, 1983), p. 88.
- Harrison, R.K., Merrill Tenney, ed., *Zondervan Pictorial Encyclopedia of the Bible* (Grand Rapids: Zondervan Publishing House, 1976), vol. 3, p. 617-622.
- Hill, Andrew E. & Walton, John H., *A Survey of the Old Testament* (Grand Rapids: Zondervan Publishing House, 1991), p. 365-369.
- Jensen, Irving L., *Jensen's Survey of the Old Testament* (Chicago: Moody Bible Institute, 1978), p. 426-430.
- McGee, J. Vernon, *Thru the Bible* notes, p. 264.
- Mears, Henrietta C., *What the Bible is All About* (Minneapolis: World Wide Publications, 1966), p. 283-287.
- Miller, Adam W., *Brief Introduction to the Old Testament* (Anderson, Indiana, Warner Press, 1964), p. 169-171.
- Wiersbe, Warren W., *Expository Outlines on the Old Testament*, (Convington, Kentucky: Calvary Baptist Church, March 1973).